

Un re-encuentro historico den club di trupialen

ORANJESTAD - Lokemester tabata un anochi simpel a bira un anochi pa nunca lubida! 'De Trupialen' e club hubenil di mas cu 50 aña, a organisa siman pasa un anochi pa celebra e 20 aña di Status Aparte y 30 aña di Himno y Bandera. Pa e ocasion aki a invita Padu Lampe y Hubert Booi como huespednan special. No ta por nada a scohe e dos personanan aki pa e anochi aki. E dos baluartenan cultural aki, ta tambe pilarnan di Trupialen. Riba e anochi aki 'Club Hubenil De Trupialen' a desvela e 'Muraya di Fama' pa honra personanan cu a hunga un rol importante den historia di e club. Padu Lampe y Hubert Booi ta e prome personanan pa uni cu Frère Alexius, e fundador di Trupialen pa wordo honra riba e muraya aki! E anochi di canto y rindimento di honor a bira un anochi cultural spontaneo cu declamacion, canto, musica di entre otro Padu y Lio mes! E anochi a bira uno inolvidabel!

PADU LAMPE

Padu Lampe ta conoci pa masha

hopi composicion bunita riba piano y canto na Papiamentu. Un di e cancionnan mas conoci cu el a compone hunto cu Rufo Wever ta e 'ARUBA DUSHI TERA'. Despues di a compone e cancion aki den añanan 50, Padu y Rufo a dicidi di graba e cancion aki riba disco. Pa canta e cantica aki Padu y Rufo a scohe e coro hubenil di Trupialen. Esaki tabata mas cu 20 aña prome cu 'Aruba Dushi Tera' a bira nos himno nacional. E tabata tambe un tempo cu no tabata canta canticanan na Papiamentu na ocasionnan oficial. Sigur no na ocasion di aubade of bishita di dignatariannan Hulandes. Sinembargo Padu Lampe, Rufo Wever y Frère Alexius e tempo ey si tabata convensi cu nos mester a canta cancionnan na Papiamentu. Hunto nan a compone y presenta cu e coro di Trupialen un cantidad grandi di cantica cu a bira tesoronan folclorico Arubano. Pa e motibonan aki Padu Lampe a converti su mes den un di e pilarnan folclorico di Aruba

y un fuente di inspiracion y creacion musical pa Trupialen. Padu Lampe ta pa e motibonan aki un persona cu tin un luga special den historia di De Trupialen. Riba e anochi aki Padu no por a resisti su gana insasiabel di toca y canta. Den e ambiente di re-encuentro cu tabata reina ela sinta tras di e piano y a toca un cancion tras di otro.

HUBERT BOOI

Den añanan 50 di siglo pasa, tempo cu obranan di teatro di Aruba no tabata existi y sigur no na Papiamentu, Hubert Booi a crea e obra di teatro "PERLA DI CARIBE" y a dirigi e presentacion di e obra aki hunto cu frère Alexius. E actornan tabata hobennan miembro di De Trupialen. E canto y declamacionnan den e obra aki te awe ta clasico den historia cultural di Aruba. Banda di e obra teatral grandi aki, Hubert Booi a compone un cantidad di cantica cu e coro di Trupialen a presenta durante di henter su historia tur rond di Aruba! Hubert Booi ta pa e motibonan aki un persona cu tin un luga special den historia di De Trupialen. Riba e anochi aki en bes di hiba un discurso, Hubert Booi spontaneamente a declama un di su poesianan den cua e ta describe e bunitesa di Aruba.

CORO DI DE TRUPIALEN

Coro di De Trupialen bou direccion di Lem Pietsz a presenta na comienso di e anochi nos himno 'Aruba Dushi Tera'. Tabata emocionante pa tende un generacion di Trupialnan completamente nobo canta e cantica cu mei siglo pasa Trupialnan, den e mes un club aki y den presencia di Padu Lampe y Hubert Booi a canta. E coro a canta otro canticanan y composicionnan di Lem Pietsz rindiendo honor na Aruba y su pueblo.

RE-ENCUENTRO HISTORICO

E anochi di rindimento di honor na Padu Lampe y Hubert Booi asina a bira un anochi di topa otro atrobe den un luga historico, e club chikito di De Trupialen, caminda asina hopi musica, canto y obranan teatral a wordo crea y presenta na pueblo di Aruba durante mas cu mei siglo. Y riba e anochi aki por a mira dos di e personanan cu mas a contribui na e historia aki, Padu Lampe y Hubert Booi hunto cu nan Trupialnan, den un ambiente di celebracion cultural. El a bira un anochi pa nunca mas lubida!

